



JUDICIAL SYSTEM MONITORING PROGRAMME
PROGRAM PEMANTAUAN SISTEM YUDISIAL



Komunikadu Imprensa

Periodu : Abril 2011

Edisaun : 03 Maiu 2011

JSMP halao terneimentu iha Suco Buibau Distritu Baucau

Iha loron 28 fulan Abril 2011, JSMP liu husi nia unidade *Victim Support Service* ka VSS hala'o treinamentu iha Suco Buibau Sub Distrito Baucau. Partisipante sira ne'ebé mak marka prezensa iha treinamentu ne'e hamutuk ema nain tolu nulu resin walu (38) ne'ebé mak kompostu husi fetu nain walu (8) no mane ema nain tolu nulu (30). Partisipante hirak ne'e asumi kargu nu'udar Xefe Suco, Xefe Aldeia, representante juventude fetu no mane, lia nain, VPU, Membru Polisia UNPOL no comunidade balun.

Materia treinamentu ne'e foka liu ba Kódigu Penál no Kódigu Prosesu Penál husi Perspetiva Vítima Violénsia Bázeia ba Jéneru, Konvensaun Internasionál hanesan Konvensaun halakon forma diskriminasaun hotu-hotu hasoru fetu (CEDAW), Lei No.7/2010 konabá Lei Kontra Violénsia Doméstika no mós Lei No. 3/2009 konabá Lideransa Komunitária inklui mós artigu balun iha Konstituisaun konabá Prinsipiu Estadu Direitu no Prinsipiu Igualdade Jéneru, nomós knaar autoridade judisiál (Juiz no Prukorador) no ajente prosesual sira seluk hanesan (Polisia - VPU, Defensór Públiku no Advogado).

VSS halao treinamentu iha Suco refere bazeia ba rekomendasaun husi VPU Distritu Baucau tanbá siklus violénsia doméstika numeru maka'as iha juridiksaun tribunál distrital Baucau.

Diretór Interinu JSMP, Casimiro dos Santos, haktuir katak, treinamentu ne'ebé JSMP hala'o ba lider komunitária ho objetivu atu hasaé koñesimentu ba lider komunitária konabá prosesu legál ba kazu violénsia bázeia ba jéneru tuir sistema justisa formal iha Timór Léste. Aleinde hasaé koñesimentu, Lider Komunitária mós iha obrigasaun atu kumpri ka halo tuir sira nia knaar ne'ebé mak konsagra ona iha Lei rasik.

Treinamentu iha Suco Buibau hetan respon diak husi partisipantes sira ne'ebé mak marka prezensa tanbá durante ne'e iha organizaun barak mak halo ona aktividade treinamentu konabá lei hanesan ne'e maibé la detail liu hanesan materia ne'ebé mak JSMP hato'o. Aleinde ne'e partisipantes sira mós rekomenda ba JSMP ba futuru se bele atividade hanesan ne'e la halo deit iha nivel Suco maibé bele mós iha nivel Aldeia hotu tanbá informaun ba sistema justisa formal importante tebes.

Husi Treinamentu ne'e JSMP/VSS hare katak koñesimentu husi autoridade komunitária konabá prosesu justisa formal liu-liu atendentu ba vítima violénsia bázeia ba jéneru minimu tebes. Maske Lei ba lideransa Komunitária hakerek momós ona katak Xefe Suco no Konsellu Suco sira iha poder atu halo prevensaun, protesaun, no kria mekanismu oi-oin atu bele proteze vítima violénsia doméstika maibé iha realidade lider Komunitária rasik falta informasaun konabá lei ne'ebé fo kompetensia ka knaar ba sira rasik.

JSMP espera katak ho treinamentu ida ne'e bele tulun autoridade Komunitária sira nia knaar lor-loron iha comunidade nia le'et no materia treinamentu ne'e sai hanesan mata dalan ba prosesu kazu violénsia doméstika ne'ebé oras ne'e dadaun nia natureza hanesan kazu krime públiku katak nia prosedimentu hahu la depende ba keixa. Atu nune'e comunidade sira iha ona konsensia rasik ba kontribuisaun moris dame no hakmatek iha sira nia familia.

Treinamentu ne'e realiza hetan tulun finaseiru husi USAID atraves husi koperasaun ho Fundasaun Azia iha Timór Léste. Treinamentu hanesan sei kontinua realiza iha distritu seluk ne'ebé siklus violénsia sae makás.

Atu hetan informasaun kle'an favor kontaktu:

Casimiro dos Santos

Direitor Interinu JSMP

Email; casmiro@jsmp.minihub.org

Landline; 3323883